

Tito

Ti Pablœ ta sts'iba batel scarta ta stojol ti Titoe

1 Vu'un Pabloun, yaj'abtelun ti Diose. Yajcholc'opun ti Jesucristoe. Ja' tacbilun yu'un yo' jech ta xquic' tael ta xch'unel ti buch'utic t'ujbilib yu'un ti Diose, yo' jech ta xojtiquinic ti meel ti c'usi jch'unojtique, ²yo' jech ta spat yo'ntonic ti ta staic scuxlejalic sbatel osile. Yu'un yaløj ono'ox ti Diose ti ta xac' ti cuxlejale c'alal mu'yuc to ox meltsajem ti banomile. Mu sna' sjut ti Diose. ³Avi tana un, ti Diose sta xa yorail ti laj yac' ta a'yiel ti sc'ope. Yu'un ja' cabtel laj yac'bun ti Jcoltavanej Dios cu'untique. Ja' smantal stuc ti vu'un ta xcale. ⁴Ta xajts'ibabot tael ti jcarta lie, Tito, ti jnich'onot ta sventa ti co'ol jch'unojtique. Ta jc'an ti ac'o yac'bot ti bendicione, ti ac'o xc'uxubinote, ti ac'o yac'bot jun avo'nton ti Jtotic Diose schi'uc ti Cajvaltich Jesucristo Jcoltavaneje.

Yabtel ti Tito ti ta Cretae

⁵Ti laj quictaot comel tey ta Creta ti joyobtabil ta nabe, yo' jech ta xachapan ti c'usi sc'an to chapanele. Ja' jech xtoc yo' ta xava'an

ancianoetic ta jujun tsobobbail ti oy ta jujun jteclume jech chac c'u cha'al laj calbot ava'ie. ⁶Ti buch'u ta x'och ta ancianoile, ja' ta sc'an ti lec ta q'uelel ti scuxlejale, yo' jech lec ti sc'oplale, ti jun no'ox ti yajnille, ti jch'unolajeluc ti snich'nabe yo' jech mu sa'bat smul ti ta sbisat ta jbjamantale. ⁷Yu'un ti buch'u ta x'och ta ancianoile, ja' ta sbain ti c'usi ja' yu'un ti Diose. Jech o xal un, tsots sc'oplal ti lecuc ta q'uelel ti scuxlejale, ti mu jbeluc ta c'ope, ti mu toyobbauque, ti ma'uc jyacubele, ti ma'uc jsa'letoe, ti ma'uc ti c'upijem yo'nton yu'un ti taq'uine. ⁸Ja' ta sc'an ti oy slequil yo'nton ti ta xich' ta muc' ti yulo' ti ta xc'ot ta snae, ti ja' jun vinic ti lec ti c'usi ta spase, ti lec ti snopobil yu'une, ti tuc' yo'ntone, ti spajesoj sba ta spasel ti c'usi chopole. ⁹Ja' ta sc'an ti jun yo'nton xch'unøj ti c'u s'elan laj yich' chanubtasele yo' jech xu' ta stsatsubtasbe yo'nton ti yan ta sventa ti lequil chanubtasele, yo' jech xu' ta stuq'uibtas ti buch'utic ta xcrontainvanique.

¹⁰Yu'un ep ti buch'u ta xcrontainvanique. Pero ja' toj más ti j'israeletic ti mu'yuc smelol ta xc'opojique, ti ta slo'laic ti

cristianoetique. ¹¹Ja' ta sc'an pajesel taje. Yu'un sbejel ta na xchibajesbe yo'nton. Yu'un ta xchanubtasvanic ti c'usi ma'uc xa stuq'uile. Yu'un ja' no'ox oy ta yo'nton ta spasic ya'iic ti canal taq'uin ta jech yepal no'oxe.

¹²Yu'un oy jun j'al'c'op ti tey ta Cretae jech laj yalbe sc'oplal ti schi'iltaque: "Ti jcretaetique jutc'opetic, mu'yuc sch'ulelic. Toj ch'ajic, pero toj ech'em xve'ic", xi. ¹³Ti jech laj yal taje, melez ono'ox. Jech o xal un, tsots xatuq'uibtas ta yalbel mantal yo' jech ac'o xch'unic lec ti Cajvaltique. ¹⁴Ja' jech xtoc yo' jech mu xich'beic ta muc' sc'opic ti j'israeletic ti snopben no'ox stuquique, yo' jech mu xich'beic ta muc' smantal ti buch'utic svalopatinojic ti melele.

¹⁵Ti buch'u lec ti sjol yo'ntone, lec ta xil scotol. Yan ti buch'u mu xch'une, ti mu lecuc ti sjol yo'ntone, mu'yuc c'usi lec ta xil. Yu'un soquem ono'ox ti sjol yo'ntone. ¹⁶Ta xalic ti xojtiquinic ti Diose, pero ta sventa ti c'usi ta spasiq, tey ta xvinaj ti mu meleluque. Yu'un xti'et sjolic, jbjamantaletic, mu xtojobic ta spasel mi jutebuc ti c'usi leque.

Ti lequil chanubtasele

2 Ti c'usi ta xavale, co'oluc me schi'uc jech chac c'u cha'al ta xac' ta na'el ti lequil chanubtasele. ²Albo ya'i ti moletique ti ac'o yich' sbijilique, ti lecuc ti sc'oplalique, ti lecuc ta q'uelel ti scuxlejajique, ti junuc yo'nton xch'unojicuc ti Cajvaltique, ti oyuc sc'uxul yo'ntonique, ti oyuc smuc'ul stsatsal ti yo'ntonique. ³Ja' jech

xtoc, albo ya'i ti yayiletique ti lecuc ta q'uelel ti scuxlejajique, ti ma'ucuc ti jlo'iltavanejetique, ti ma'ucuc ti jyacubeletique. Ja' ta sc'an ti ac'o yaq'uic ta q'uelel ti c'usi leque. ⁴Yu'un ja' yabtelic ti ta xchanubtasic ti tsebal antsetic ta xc'uxubinel ti smalalique schi'uc ti yolique, ⁵ta spasel ti c'usi leque, ti lec ti stalelique, ti ta sventain ti snae, ti oy slequil ti yo'ntone, ti co'oluc yo'nton schi'uc ti smalale, yo' jech mu'yuc buch'u chopol ta xc'opoj ta stojol ti lequil ach' c'op yu'un ti Diose.

⁶Jechuc me xatsatsubtasbe yo'ntonic xtoc ti querem vinqetique ti tuc'uc ti sjolique. ⁷Ac'bo yil ti vo'ote ti lec ta xapas scotole. C'alal ta xachanubtase, ta slequiluc ta yutsiluc avo'nton. ⁸Oyuc smelol xtoc ti c'usi ta xavale, yo' jech mu xasa'bat amul. Jech ti buch'u ta xcrontainvane tey ta xq'uexav. Yu'un mu xu' ta xchopol-c'opoj ta atojolic.

⁹Bijubtaso ti mosoviletique ti ac'o xch'unbeic smantal ti yajvalique, ti lecuc ti yo'ntonique, ti mu ta tac'obiluc ta xc'opojique. ¹⁰Albo ya'iic ti mu me x'elc'ajique. Ac'o yaq'uic ta ilel ti lec yo'ntonique, yo' jech ta xq'uelbat scotol ti scuxlejajique ti yan yutsil ti chanubtasel yu'un ti Jcoltavanej Dios cu'untique.

¹¹Yu'un ti Diose laj xa yac' ta ilel ti sc'uxul yo'ntone, ti ja' scolelic scotol ti cristianoetique. ¹²Ti sc'uxul yo'nton ti Diose ja' ta xischanubtasotic ta yictael ti c'usi chopole schi'uc ti sc'upijel o'ntonal yu'un ti sba banomile. Ja'

ta xischanubtasotic ti ac'o ayanuc batel ti lequil cuxlejäl li' ta sba banomile yo' jech lec, jun co'ntontic ta xquich'tic ta muc' ti Diöse. ¹³Ja' jech xtoc ja' ta xischanubtasotic ti ac'o jmalatic ti jun muc' ta c'ac'al ti albil ono'ox sc'oplale. Yu'un jun yutsil ta xtal ti muc'ul Dios cu'untique schi'uc ti Jcoltavanej Jesucristoe. ¹⁴Yu'un ti stuque ja' laj yac' sba ta milel ta jcojtic yo' jech ta scoltaotic loq'uel ta stojol ti mulile, yo' jech ta slecubtas ta j'ech'el ti co'ntontique, yo' jech ta xijc'ot ta yu'un, yo' jech ta xbat co'ntontic ta spasel ti c'usi leque.

¹⁵Ti va'i s'elan laj calbot li'e, ja' avabel ti ta xatsatsubtasbe ta xatuq'uibtasbe yo'ntonic. Ja' me jech xapas yo' jech mu xasbajic.

Jech ta sc'an ta spasic ti jch'unolajeletique

3 Vulesbo ta yo'ntonic ti jch'unolajeletique ti ac'o yich'ic ta muc' ti ajvaliletique, ti j'opisialeletique, ti ac'o xch'unbeic ti smantale, ti chapalicuc ta spasel ti c'usiticuc leque. ²Mu me buch'u xchopol-c'optaic, lamajemuc me ti yo'ntonique, oyuc me slequial yo'ntonic ta stojol ti cristianoetique.

³Yu'un ta vo'ne ti vo'otic eque, toj alticotic to ox. Toyobbaotic to ox ta stojol ti Diöse. Ch'ayemotic to ox ta be. Ochেমotic to ox ta mosovil yu'un ti c'usi lec ta xa'i ti co'ntontique. Yu'un ja' cuxulotic to ox ta spasel ti c'usi chopole, ti it'ix o'ntone. Yu'un soquet to ox ti joltique. Chopol to ox ta xquil jbatic ta jujun talel. ⁴Pero c'alal laj yac' ta ilel sc'uxul yo'nton

ti Cajvaltic Dios Jcoltavanej ta stojol ti cristianoetique, ⁵tey laj scoltaotic. Pero ma'uc ta sventa ti oy c'usi lec laj jpastique. Yu'un ja' no'ox ti c'uxubaj yo'nton ta jtoltique. Laj scoltaotic ta sventa ti laj slecubtasotic ti Ch'ul Espiritue. Yu'un laj svoq'uesotic ta ach' yo' jech ach'ub ti cuxlejale. ⁶Ta sventa ti Jcoltavanej Jesucristoe, mu bisbiluc laj yac'botic ti Sch'ul Espiritu ti Diöse, ⁷yo' jech ta sventa sc'uxul yo'nton ti Diöse lec ta xijyilotic, yo' jech ta xquich'tic ti cuxlejäl sbatel osil ti jmalaojtique.

⁸Ti jech taje, melec ono'ox. Ta jc'an ti ta xavac' persa ta yalolanel ti va'i s'elan taje, yo' jech ti buch'utic ta xch'unic ti Diöse batuc ta yo'ntonic ta spasel ti c'usi leque. Ti jech taje, toj lec. Yu'un ja' ta xtun cu'un jcotoltic. ⁹Yan ti voch voch c'op ti mu'yuc smelole, schi'uc sc'oplal ti smolmuc'totic ti tey ono'ox ta xalolanique, schi'uc ti ta stsacolan sbaic ta c'op ta sventa smantal ti Moisesse, mu me xatic' aba tey. Yu'un mu'yuc c'usi xtun o. Mu'yuc smelol.

¹⁰Mi oy buch'u ta spas sba ta cha'ch'ac yu'un ti jch'unolajeletique, albo ya'i jun mi chib velta. Mi mu xich' ta muc' ti c'usi ta xavalbee, ch'aco loq'uel. ¹¹Yu'un xana' lec ti soquem ti sjol ti vinic taje. Ja' jech xtoc ti stuque sna'oj lec ti chopol ono'ox ti c'usi ta spase.

Ti c'usi ta sc'an stuc ti Pabloe

¹²C'alal tey ta jtac talel ta atojol ti Artemase, mi ja' ti Tíquicoe, ac'o persa ti c'u yepal xu' avu'un ti ta xtal aq'uelun no'ox ti ta Nicópolis. Yu'un laj xa jnop

ti tey ta x'ech' cu'un ti yorail sictique.
¹³Coltao me ti licenciado Zenase ti c'u
 yepal xu' avu'une schi'uc ti Apolose.
 Ac'bo ti c'usi ta xtun yu'unic ta bee, yo'
 mu'yuc palta ta xa'iic. ¹⁴Ac'o xchanic ti
 quermanotic ta spasel ti c'usi leque, yo'
 jech ta xcoltavanic ti bu tsots sc'oplal ta
 xtune, yo' jech jtunelicuc ti li' cuxulique.

Slajeb chabanuc schi'uc bendición

¹⁵Scotol ti c'u yepal ti li' jchi'inoje,
 chabanucot xayalbe. Chabanuc
 xavalbe ya'iic ti jchi'iltac ti
 jmoj jch'unojtic schi'uque. Ac'o
 yac'boxuc bendición acotolic ti
 Diose. Jechuc.